



**Uunga siunnersuut Meeqqanut suli atualingitsunut perorsaanikkut inerikkiartuutaasunik ulluunerani neqeroorutit pillugit Inatsisartut Inatsisaat**

(Meeqqanut, Inuusuttunut, Ilinniartitaanermut, Kultureqarnermut Timersornermut Ilageeqarnermullu Naalakkersuisoq)

(Siullermeerneqarnera)

Demokraatit siunnersuummut qujapput. Uagutsinnut pingaartuuvoq, ukkatariuarneqassasoq meeqqat tamarmik maani nunatsinni pitsaanerpaamik meeraanissaasa qulakkeerneqarnissaat.

Toqqissisimanartuullunilu nuannersuusaaq Kalaallit Nunaanni meeraaneq.

Demokraatini isumaqanngilagut, ulluunerani paaqqinnittarfik, meeqqanik paaqqinniffiunnassasoq – tassaasariaqarpoq meeqqatta ineriartorfissaat pinnguarnikkut taamaaliornermikkullu suliamikkut inooqataanikkullu meeqqat atuarfiannut piareerlutik. Tamanna perorsaanermik annertuumik pisariaqartitsissaaq.

Taakkuluuku maani nunatsinni perorsaat pikkorissut qitiulluinnartut, taakkua piviusunngortinnissaannut. Taamaattumik pingaartuuvoq, isumaguassagipput, perorsaat pitsaasunik akissaasersorneqarlutillu suliffimmini atugarisaarnissaat, perorsaat naammattut suliniutit pitsaasut piviusunngortinnissaannut, tamatta meeqqanut suli atualingitsunut piviusunngorterususutatsinnut.

2020-mut uterutta ukiut arlallit annertuumik sorsuutigereerlugu kiisami perorsaat akissarsiaasa qaffannissaat anguneqarpoq. Taannaanaq pigaanni ajunngilaq, kisiannili suli eqqumaffigisariaqarparput. Aamma pingaartuuvoq, perorsaat meeqqallu akornuteqaratik sammisaqarnissaminnut pitsaasunik inissaqartinneqarnissaat. Inissat pitsaasut suliffiullu pitsaasup kingunerissavaa, meeqqat inersimasullu ulluunerani paaqqinnittarfinni nuannersumik ulluinnarminnik ingerlatinissaat ukkataralugu, meeqqat iluarusuttut ineriartortullu.

Aammaana ulluunerani paaqqinnittarfinni, perorsaat suliaminnut pikkorinnerujussuuartik aqutigalugu maluginiartussaagaat, meeqqat ajornartorsiutillit. Imaassinnaavoq autismeqarlutik imaluunniit ADHD-eqarlutik suli paasineqarsimanngitsut. Aammali imaassinnaalluni ersiuteqartoq, meeqqap angerlarsimaffimmini sumiginnagaanera. Pinngitsoornani tamarmik, qisuariarfigineqarnissamik pingaaruteqartut, aallartitsisoqartariaqassammat, meeqqat eqqortumik ikiorneqarlunilu tapersorneqarnissaa.

Demokraatit nuannaarutigaat tusarniaanermi akissuterpassuit, uunga siunnersuummut tiguneqarsimasut. Tamassuma takutippaa, amerlasoorujussuit, pingaartikkaat, meeqqat pitsaasumik meeraanissaat. Eqqartorneqartumut soqutiginninneq taanna pitsaanerpaamik atorluarniartariaqarparput. Taamaattumik isumaqarpugut, Ilaqutariinnermut- aamma Peqqissutsimut ataatsimiisitaliap sukumiisumik tusarniaanermi akissutit tamaasa misissortariaqarai, attuumassuteqartullu ataatsimiigiqqullugit, taamaasilluta



qulakkeersinnaagatsigut, isummersuutit assigisaasalu pitsaanerpaanissaat, ataatsimoorluta qulakkeersinnaagatsigu, inatsisissaviup piumasarineqartutut meeqqamut ajunnginnerpaaq aallaavigalugu sananeqarnissaa.

Taamatut oqaaseqaateqarluta siunnersuut Ilaqutariinnut- aamma Peqqissutsimut ataatsimiititaliamut ingerlateqqinneqarnissaa innersuussutigaarput.